

**Obraćanje predsjedatelja Zastupničkog doma Parlamentarne skupštine BiH
Šefika Džaferovića na 13. Konferenciji predsjednika parlamenata zemalja
članica Jadransko - jonske inicijative u okviru teme "Uključivanje
parlamentarne dimenzije u realizaciju ciljeva Jadransko-jonske inicijative"**

Neum, 23. travanj 2015.

"Uvažene ekscelencije,

Drage kolegice i kolege,

Dame i gospodo,

Nadam se da ćemo danas u prijateljskoj atmosferi i konstruktivnom i otvorenom dijalogu odgovoriti na neke od izazova koji se nalaze pred nama parlamentarcima, a koji se odnose se na jačanje uloge najviših zakonodavnih organa u realizaciji ciljeva Jadransko-jonske inicijative.

Zemlje članice Jadransko-jonske inicijative su tokom vremena identificirale zajedničke prioritete na kojima će sarađivati. Od prošle godine ti prioriteti su obuhvaćeni i Strategijom EU za Jadransko-jonsku regiju.

Znamo da je glavni cilj Strategije Evropske unije za jadransko-jonsku regiju da unapređenjem njene privlačnosti, konkurentnosti i povezivanja promovira njen ekonomski i društveni razvoj.

Želio bih naglasiti da Strategija EU za Jadransko-jonsku regiju u cijelosti korespondira s novim pristupom Evropske unije prema Bosni i Hercegovini. Ovo je nova šansa za Bosnu i Hercegovinu i veoma je bitno da vlasti u BiH prihvate ove prioritete kao platformu za djelovanje.

Uz novi pristup Evropske unije i regionalnu saradnju, regionalnim projektima moramo pristupiti tako da kroz njih jačamo društvo i zajedničke vrijednosti u široj regiji.

Kao konkretne projekte buduće regionalne saradnje čije bi benefite osjetili građani cijele regije izdvojio bih nekoliko projekata u oblasti infrastrukture koji su prije nekoliko dana usvojeni u Briselu. Ovdje bih pomenuo izgradnju Jadransko-jonskog koridora i koridora 5C, kako putnog tako i željezničkog i bolje povezivanje koridora prema Beogradu i Zagrebu i dalje.

Dame i gospodo,

Regionalna saradnja jedan od prioriteta vanjske politike Bosne i Hercegovine, koja svoju budućnost vidi u zajednici s drugim državama Evrope i svijeta. U tom smislu, jačanje parlamentarne dimenzije moglo bi da pokrene rješavanje važnih pitanja radi postizanja političke i ekonomske stabilnosti regije.

Uloga parlamenta u okviru Jadransko-jonske inicijative često je razmatrana na godišnjim konferencijama predsjednika parlamenata zemalja članica.

Također je često razmatran odnos parlamenta i izvršne vlasti, kada je u pitanju vanjska politika i regionalna saradnja. Bez obzira na ustavnu i svaku drugu ulogu parlamenata kao vrhovnih autoriteta u svakoj demokratiji pa i u našoj, postavlja se pitanje da li je u praksi zakonodavna vlast u sjeni izvršne.

Budući da je usklađivanje zakonodavstva jedan od bitnih preduslova za ulazak u Evropsku uniju, želim da istaknem značaj uspostavljanja kompatibilnosti pravnih propisa različitih država u čemu parlamenti imaju važnu ulogu.

U tom procesu, druga važna uloga parlamenta jeste kontrola nad radom vlade. Parlament i njegove službe ne mogu da zamijene vladu i ne treba da se utrkuju s njom i svim njenim ministarstvima, službama i agencijama u izradi zakonodavnih akata usklađenih sa *acquisem*.

Ali, parlamenati moraju politički da kontroliraju procese evropskih integracija i potom pristupanja Evropskoj uniji.

Kada je u pitanju uključivanje parlamentarne dimenzije u realizaciju ciljeva Jadransko-jonske inicijative, smatram da je neophodno doći do zajedničkog pravnog okvira za zemlje članice, koji bi omogućio razvoj projekata s obje strane mora, s posebnim naglaskom na projekat makroekonomske regije.

Ništa manje nije značajna ni potreba unapređenja zakonodavstva kao glavne pretpostavke za očuvanje sigurnosti u jadransko-jonskoj regiji, zaštitu životne sredine, kulturne baštine i morskih dobara u svim oblicima općenito.

Također, mislim da parlamenti treba da insistiraju na uvođenju principa *regionalne odgovornosti* kao garancije uspjeha.

Bosna i Hercegovina ima velika očekivanja od zemalja učesnica ove konferencije smatrajući da parlamenti ove regije treba da ujedine snage, unaprijede i usklade domaća zakonodavstva u oblastima u kojima su zemlje članice Jadransko-jonske inicijative definirale zajednički interes.

Bosna i Hercegovina očekuje da će ovakav vid saradnje doprinijeti jačanju mira i sigurnosti te učvrstiti regionalnu stabilnost. Također sam uvjeren da se bez integracije zemalja zapadnog Balkana u Evropsku uniju taj proces ne može smatrati završenim. Bosna i Hercegovina kao zemlja koja trenutno predsjedava Jadransko-jonskom inicijativom spremna je dati svoj puni doprinos na tom putu.

Dame i gospodo,

Smatram da nacionalni parlamenti mogu imati ključnu ulogu u jačanju saradnje između država članica Inicijative i u procesu evropskih integracija.

Također, mislim da parlamenti treba da budu pokretači promjena i da sami stvaraju viziju parlamentarizma u budućnosti ove regije.

Smatram da je ova konferencija od velikog značaja i koristi za sve države jadranske i jonske regije te da će parlamentarna dimenzija Jadransko-jonske inicijative dodatno ojačati razvoj regionalne saradnje.

Vjerujem i da će međuparlamentarna saradnja u okviru Jadransko-jonske inicijative dati pozitivan doprinos intenziviranju procesa evropskih integracija država zapadnog Balkana. Parlamentarna skupština BiH će u punoj mjeri podržati aktivnosti Jadransko-jonske inicijative te u njima učestvovati.

Hvala na pažnji." (kraj)